

四庫全書

集部

欽定四庫全書

集部  
宋詩鈔卷九十六

詳校官中書臣賈 鉉

主事銜臣徐以坤覆勘

總校官編修臣王燕緒

校對官中書臣劉源溥

謄錄監生臣鄭家屏

欽定四庫全書

宋詩鈔卷九十六

內閣中書舍人吳之振編

戴復古石屏詩鈔

訪蒼山曾子實

故人子曾子居處近金精福地佳山水詩家老弟兄十  
年重會面一笑最關情萬象亭前月今宵為我明

事機

天下事機別朝廷局面新臺官遷不定年號改何頻黜  
陟由明主安危仗老臣祖宗成憲在即此是經綸

所聞二首

中使入廣詔宣崔  
右相賊起梗道

屢遣和金使三邊未解兵武夫權漸重

闕

望何輕天

下思豪傑君王用老成時無渭濱叟白首致功名

右席須賢久丹書幾度催賊驚中使轉人望相公來聞

政曲江宅調羹庾嶺梅莫因多病後虛出應三台

張端義應詔上書謫曲江正月一日贛州相遇

憂世心何切謀身計甚疎樽前話不盡天下事何如漢  
武求言詔賈生流涕書龍顏那可犯謫向曲江居

正朝送遷客好去看梅花此嶺幾人過念君雙髻華直  
言知為國遠地莫思家韶石叶虞舜傷哉古道賒

聞杜儀甫出臺

與知宗趙山  
甫甚厚善

臺官關係重用舍一何輕諸老多慚德斯人有直聲儻  
來視軒冕歸去即功名莫拜寬堂暮傷心隔死生

揚州道宮安下制幹朱行甫撫幹方巨山連騎相訪

道院羣仙集高軒二妙來文章清氣足談笑老懷開落  
木三秋晚黃花九日催何當陪勝踐一作餞共把蟹螯杯

朱行甫和前韻送別烹鹿薦酒

此別真成別從今去不來佳人難再得惡抱向誰開客  
路一歸晚家書幾度催慙勤見君意烹鹿薦離杯

諸詩人會于吳門翁際可通判席上僕有客星聚

吳會詩派落松江之句方子萬喜之遂足成篇

客星聚吳會詩派落松江老眼洞千古曠懷開八窻風

流談奪席歌笑酒盈缸楊陸不再作何人可受降

別邵武諸故人

白髮亂紛紛鄉心逐海雲此行堪一哭無復見諸君老  
馬尋歸路孤鴻戀舊羣酒闌何處笛今夜不堪聞

一老儒為貴人燒丹丹垂成而走因此失所

道途多險阻此老欲何之命薄丹砂走天寒白髮悲從  
教達官罵忍受小兒欺月夜雙鳥鵲飛鳴繞樹枝

江上夜坐懷嚴儀卿李友山

江清天影動樓近角聲雄楊柳枝月芭蕉葉葉風佳  
人難再得良夜與誰同別後知何處吟詩句句工

江上

扁舟泊江渚喜近酒家門出網魚鰕活投林鳥雀喧無  
橋通竹處有路到桃源一見南塘字淒然憶故園

僕所居之地名

舟中

扁舟何處泊沙渚夕陽邊遠浦橫魚網高山起燒烟客  
行今老矣秋思日淒然且復開懷抱囊中有酒錢



所聞

北風如許急亦使客心寒  
近得襄陽報仍聞蜀道難  
三杯中夜酒一枕幾時安  
江上兩都督何人上將壇

訪徐益夫

仲蔚蓬蒿宅終朝只閉關  
無心與時競未老得身閒  
綠繞巡除水青橫隔岸山  
客來新酒熟相對一酡顏

渝江綠陰亭九日燕集

九日江亭上誰憐老孟嘉  
要人看白髮不用整烏紗  
寄

興題桐葉長歌醉菊花歸心徒自苦猶在楚天涯

夜吟呈趙東巖

汲井漱殘酒行吟到夜分一軒清似洗萬籟寂無聞風  
送迎秋雨天收翳月雲雞鳴庭戶白人事又紛紛

有感

皺眉觀世事把酒讀離騷天下無公論胷中有古刀陡  
然成耿耿何以制滔滔不逐羣飛轉孤鴻畢竟高

春陵山中寫寄孔海翁

昨日分攜後回頭望竹關相親惟白水所見但青山雲  
近人家遠苔生石徑斑聞鐘知有寺又在渺茫間

飲蕭和伯家醉登快閣和楊伯子題分明觀韻

醉歸蕭史宅快閣倚西東山斂過雲雨江無起浪風月  
行銀漢上人在玉壺中天眼照塵世應憐鶴髮翁

客中歲晚呈何宏甫

歲事費料理三杯意適然與其愁度日曷若醉忘年桑  
落冬前酒梅花雪後天不知身是客多謝主人賢

新春李大解后游江上園勸游人不可折花木禁  
漁弋者不捕禽魚酒邊談論可聽乃中洲先生  
之後葉水心嘗與往來

坐斷此江干池亭百畝寬禽魚全性命花竹報平安有  
道行其志非時做甚官丰神更閒雅野服竹皮冠

都下書懷

半月不把鏡羞看兩髻塵讀書增意氣攜刺減精神道  
路誰推轂江湖賦采蘋從來麋鹿性那作帝鄉人

艤舟登滕王閣

散步登城郭，維舟古樹傍。  
澄江浮野色，虛閣貯秋光。  
卻酒淋衣濕，搓橙滿袖香。  
西風吹白髮，猶逐少年狂。

湖口

水落山增峻，江空石出奇。  
倚蓬看不足，解纜放教遲。  
沙上雁初到，樽前蟹可持。  
中秋能幾日，又是菊花時。

夏日從子淵姪借茉莉一盆

舉眼驚如許，衰懷強自安。  
愛涼臨水坐，遣病借花看。  
物

物同天地人人各肺肝從來涇與渭混作一流難

吳門訪舊

孟良夫侍郎  
有藏春園

去此十三秋重來雪滿頭鏡顏加老醜詩骨帶窮愁鳥  
語新晴樹人尋舊倚樓藏春門下客一半落山丘

哭澗泉韓仲止二首

只選後篇欲記其臨  
終一節故併錄之

雅志不同俗休官二十年隱居溪上宅清酌澗中泉懷

慨傷時事淒涼絕筆篇三篇遺稿在當並史書傳

聞時事驚

心得疾而死作所以桃源人所以商山人所以鹿門人三詩此絕筆之詩也

忍貧長傲世風節似君稀死後兒女嫁峽中兒女歸門  
人集詩稿故卒服麻衣澗上梅花發吟魂何處飛

瑯琊山中廢寺

欲訪山中寺沿堤石甃長寶坊兵後廢御帖窖中藏故  
址生秋草寒窻帶夕陽孤僧出迎客滿口話淒涼

鄂州戎治靜憩亭

幽亭何處尋巖樹碧森森獨坐生雲石少安經世心伴  
人雙鶴立多事一蟬吟提劍翻然起中原秋草深

江上

江上維舟穩人間行路難數朝花雨細一夜社風寒燕  
語能留客蛙鳴豈爲官苦吟成底事贏得瘦團圞

海陵光孝長老驥無稱山谷後也共談時事且說  
黃柑橘之美

俗子避形影僧家共往還高談犯時忌妙語發天慳霜  
後思新橘夢中歸故山何時免奔走終老白雲關

杜仲高高九萬相會



杜癖詩無敵高髯盡絕倫笑談能不朽富貴或成塵今  
古多奇士乾坤幾怪民相逢不容易一醉楚江濱

衡陽寫懷簡王景大趙俊卿

夢覺他鄉枕寒生半夜衾客程湖外遠秋意雨中深老  
馬尋歸路羈鴉憶故林家書連數紙難寫此時心

懷趙德行

學慈湖從  
趙元道游

所學源流遠淡交滋味長看來渾易與別去自難忘獨  
客夢千里佳人天一方細觀賓退錄亦足慰淒涼

上封

樓臺逼霄漢  
窻戶納雲霓  
回顧千巖路  
如登萬仞梯  
泉從山頂出  
雪壓樹頭低  
高絕無人境  
非僧不可棲

九日

今日知何日  
他鄉憶故鄉  
黃花一杯酒  
白髮幾重陽  
日晚鴉爭宿  
天寒雁叫霜  
客中無此醉  
何以敵淒涼

春陵道上

雲際尋行路  
時逢一兩家  
山川閒世界  
耕釣小生涯  
病

竹長新笋寒芒搖落花溪翁解延客連煮數杯茶

化成巖

城郭囂塵外江山勝槩中鏗然一灘水和以萬松風夾  
徑森竒石危亭納太空蒼巖不能語曾識贊皇公

喜聞平峒寇

峒寇都平了官軍奏凱歌千山通道路一雨洗干戈天  
地和風轉江湖春水多蜀中無近報西賊定如何

郭伯秀約聯騎春游不去有詩

心老尋春懶年衰跨馬難便能相強去未必有真歡獨  
酌三杯妙高眠一枕安好花如可折覓取數枝看

泉南

南地無冰雪常疑暖作災晝昏山霧合寒變海風來壠  
麥銜芒早梅花帶葉開客中歸未得歲事漸相催

代人送別

南浦春波碧東風送客船別君楊柳外揮淚杏花前粉  
壁題詩句金釵當酒錢一聲離岸櫓心碎楚江邊

度淮

一雨足秋意孤吟寫客懷  
人情容易變身事苦難諧  
每  
日思歸浙今朝却度淮  
此生煩造物略略為安排

吳子似

載酒櫻桃熟隈亭柳樹陰  
青山去人遠黃鳥話春深  
薄俗非吾道虛名愧此心  
休言今不古又恐不如今

世事

世事直如夢人生不肯閒  
利名雙轉轂今古一凭欄  
春

水渡傍渡夕陽山外山吟邊思小范共把此詩看

冬日移舟入峽避風

棹入黃蘆浦驚飛白鷺羣霜華濃似雪水氣盛於雲市  
遠炭增價天寒酒策勲同舟有佳士擁被共論文

湖上

久住人情熟湖邊酒可賒來時飛柳絮今日見梅花十  
載身為客幾封書到家斜陽照林屋獨立數棲鴉

讀改元詔口號

伏讀改元詔仍觀拜相麻競傳新政事方見好官家雪  
作豐年瑞梅開近臘花路逢江上客立馬問京華

喜見新除目焚香洗眼看老儒居翰苑正士作臺官有  
道為時用非才處位難寄聲崔與李催一作惟促到長安

國以人為重人惟德可招九重方厲政諸老盡歸朝盛  
事追三代清風動百僚切聞天上語歡喜到漁樵

秋興有感

客游江海上幾度見秋風遠浦蘆花白疎林秋實紅人

情朝暮變景物古今同老眼猶明在從教兩耳聾

謝王使君送旅費

風撼梅花雨霧籠楊柳烟如何殘臘月已似半春天歲裏無多日閨中過一年黃堂解留客時送賣詩錢

舟中小酌

獨立秋風裏悵然思故鄉街頭沽美酒船上作重陽籬菊一枝瘦溪魚三寸長客中聊爾耳亦可慰淒涼

光澤溪上



艤棹西岩下舟人語夜闌風林無鳥宿石窟有龍蟠月  
色連沙白灘聲入夢寒曉來新得句寄與故人看

約游曾叅政西墅病不能去

骨肉去家遠異鄉童僕親老身渾賴汝久病亦愁人無  
暇游西墅尋醫訪北辰主翁翻作使奔走莫勞神

趙景賢送荔枝

荔子固多種色香俱不同新來嘗小綠又勝擘輕紅大  
嚼思千樹分甘僅一籠嘗觀蔡公譜夢想到莆中

客自邵武來言王楚使君平寇

聞說賊來日君能判死生扁舟載母去倚劒到天明百  
姓各逃命四旁無援兵王尊豈非勇獨自守孤城  
太守自監軍片膽大如身立馬斬數賊犒軍捐萬緡威  
行千里外手活一城民孰謂書生怯書生中有人

新年自唱自和

聖朝開寶歷淳祐四年春生自前丁亥今逢兩甲辰黃  
梁一夢覺青鏡二毛新七十八歲叟乾坤有幾人

死灰無復暖槁木不逢春近日愁多病今年歲在辰處  
喧如處寂求舊不求新笑問長河水誰為不老人  
江山一夜雨花柳九州春過節喜無事謀歡要及辰年  
年仍歲歲故故復新新把酒有餘恨無從見古人

聞嚴坦叔入朝再用前韻

淒涼風雨日強把甕頭春獨守空虛寶那逢耗磨辰

見荆

楚歲時記正月十三日為耗磨辰

詩書青眼舊世路白頭新每誦梅花

句一心思故人

嚴公有詩云過却海棠渾未醒  
夢中猶自呼梅花膾炙人口

感寓

自覺心無愧何須座右銘人將金作鴈吾以石為屏年  
老醫難療天寒酒易醒菊花香到死不肯就飄零

新歲書懷四首

衰年百病身淳祐五年春塵世自多事風光又一新鄉  
人方拜相野客自垂綸說與煙波侶海濱非渭濱

七十九歲叟時吟感寓詩年高胡不死身健欲何為細  
柳綠垂地小桃紅滿枝春風不到處枯蔓挂疎籬

老病從人笑兒童識我誰窮愁無地著心事有天知鵲  
噪綠何喜蛙鳴豈為私如何得懷抱長似醉眠時

正月復二月百年如一年世間人易老天下事難全生

計麥十斛傳家詩幾篇眼前雖不足心地自超然

一作村翁

不識字白  
屋貯青錢

### 小園

小園春欲半老子作兒嬉政喜花開蚤還愁客到遲詩  
當得意處酒到半酣時蜂蝶來無數無知却有知

蕭飛卿將使赴湖北戎幕詩送其行兼簡秋壑賈

總侍

鄂渚三千里遙遙望使星江湖今寂寞桃李半凋零世  
有一秋壑時無兩石屏平生不相遇老眼向誰青

晚望懷長沙故人

却扇清風起樓頭坐晚涼青山連遠水綠水帶斜陽客  
路傷離別人情果在亡定應今夜夢隨月到瀟湘

寄虛齋趙侍郎

老眼開還闔秋懷醉不醒乾坤多變故人物曉天星藥  
石匡時切著龜見事靈得公十數輩亦足壯朝廷

送王子總卿二首

荏苒歲云暮雪霜天正寒取程毋太急御下放教寬朝  
夕去家遠關山行路難邊頭辦功業恐不在儒冠  
荆門在何許鄂渚小躊躇宿處好看劍客中宜讀書交  
遊天作合江漢景何如窻戶半天上南樓好寓居

得古梅兩枝

一作雪川劉  
叟家古梅

老幹百年久從教花事遲

一作有此老梅樹君從何處移

似枯元不死

因病反成竒玉破

一作雪點

稀疎蕊苔封古怪枝誰能知我

意相對歲寒時

一作連朝看不足政要看花遲

貧作負恩人為何宏甫作

九陌塵中事三生石上身狂為好詩客貧作負恩人十載江村別扁舟塗水濱音書久不至得夢往來頻

山中少憩

地僻人稀到山寒水欲冰聞鐘如有寺見犬不逢僧斷



龍森

一作生

喬木頽簷挂古藤斜陽照孤影詩骨瘦峻嶒

豫章東湖避暑

行坐自徜徉吟聲繞屋梁曉煙溼柳色晨露發荷香以  
我一心靜叅他六月涼淵明知此意高卧到羲皇

徧訪諸亭館蒼苔掩舊蹤十年如昨日萬象又秋容  
世存喬木沁堤倚瘦筇何人殺風景斫盡木芙蓉

濠州春日呈趙教授

體國

柳似眠初起梅雖老可觀冰開春水活風暖雪泥乾得

酒忘為客談詩不論官無人知此意一笑對黃冠

訪古田劉無競

潛夫宰建陽有聲人  
言自有建陽無此宰

前說建陽宰古田今似之難兄與難弟能政更能詩文  
字定交久江湖識面遲人傳花萼集俱受水心知

淮上回九江

江水接淮水扁舟去復回客程官路柳心事故園梅活  
計魚千里空言水一杯石屏有茅屋朝夕望歸來

鄭南夫雲林隱居

一來陪勝踐

一作饒

再到惜蹉跎計得山中景行尋竹外

坡天寒梅信早海近雁聲多煙渚蒲洲外時聞欸乃歌

見名園荒廢有感

喬木無留影殘花尚假妍荒池蛙叫噪破屋燕周旋富貴偏多事風流得幾年牆東有寒士書種世相傳

題黃仲文雙清亭

亭下新池好亭中古意存欲通溪上路遂闢竹邊門自昔好賓客相傳到子孫會看司命鶴時到種瓜園

莆中遇方

關

邀出城買蠟而飲一僧同行

出郭斷虹雨倚樓新雁天三杯古榕下一笑菊花前入  
市子魚貴堆盤牡蠣鮮山僧慣蔬食清坐莫流涎

天竺訪明上座

顧影良堪笑胡為八尺長蒼顏抗塵土餓喙說興亡

一作

文章竹雨先秋爽松風生夜涼愛尋湖上寺留宿贊公房

隆興度夏借東湖驛安下

面對一池荷四旁楊柳坡樹陰遮日少屋敞受風多疑

是清涼國暫為安樂窩人人爭避暑老子自婆婆

族姪孫子榮之子神童顏老不幸短命而死哭之

不足詩以悼之

昨應童科日羣兒立下風丰姿傾衆目文采動諸公兩  
耳能兼聽六經皆暗通相期到楊晏有始奈無終

汝祖積陰德汝翁多讀書汝生天報施汝死又何如脩  
短有定數賢愚莫問渠冥官聞慟哭還許再來無

神童諱顏老生而秀骨竒姿非凡子比及晬父漁村

徇俗脩試兒故事羅書籍玩具果穀於席顧盼無所  
取獨挈禮記一帙披捲若讀誦然稍長口授以書兩  
耳兼聽日記數千百言七歲能暗誦五經舉止應對  
儼若成人十歲善屬文思如湧泉王帥幹懋卿試以  
數題捉筆輒就懋卿稱賞不容口嘉熙元年丁酉叅  
政范公嘉其俊異舉應神童科第一後省中勅賜免  
解進士朝廷以其能行文永免年十三卒

題董侍郎山園

行盡芙蓉徑尋秋扣竹關樓高納萬象木落見羣山平  
野水雲際畫橋煙雨間紅塵城下路只隔一湖灣

春陵山中

地僻民風古雨晴天氣新空山豎奇石喬木墮枯薪深  
入千崖路多逢百歲人繁華凋性命寂寞可全真

曾雲巢年八十聰明不衰小楷寫六經家有小樓  
日登覽不倦諸監司嘗薦遺逸

八十雲巢老諸公舊典刑心情古井水輩行曉天星身

健登高閣眼明書六經嘗聞薦遺逸何以報朝廷

同安子順訪茅庵道人鳳凰麒麟不可見道人語也  
道者日高卧清風隔世塵鳳麟不可見猿鳥自相親山  
木輪囷古茶花冷淡春草荒門外路常怕有來人

會李擇之其父名丙字南仲著丁未錄丙申錄

吟邊逢李白談笑亦風流相對各青眼安知有白頭兩  
家窮活計四海老交游不負雲山約同登百尺樓

山中夜歸



落盡一林月山中夜半歸驚行羣犬吠破暗一螢飛舉  
我赤藤杖敲君白板扉興來眠不得吟到曉星稀

題春山李基道小園

灑洒數椽屋旋營花竹坡心寬忘地窄亭小得山多共  
賞春晴好其如客醉何棲鸞將遠舉寧久盼庭柯

東軒

喜鵲飛  
花即景

東軒亦瀟灑春晚雨晴時喜鵲立門限飛花落硯池青  
山解留客綠竹遍題詩一點歸心動夜來聞子規

宿農家

宿此屋頭閣瓦窻通月明夜深鸛鵒噪人靜桔槔聲村落有古意田園闕客情儒衣成底事所得是虛名

江濱曉步

津頭曉步落潮痕行盡蒲根到柳根雁影參差半江月雞聲唧唧數家村求魚看下列筒釣乞火聽敲隣舍門料得錦城無此景欲將圖畫寄王孫

鄂渚煙波亭

倚遍南樓更鶴樓小亭瀟洒最宜秋接天煙浪來三峽  
隔岸樓臺又一州豪傑不生機事愆古今無盡大江流  
凭欄日暮懷一作思鄉國崔顥詩中舊日愁

春日二首黃子邁大卿

野人何得以詩鳴落魄騎驢走帝京白髮半頭驚歲月  
虛名一日動公卿頗思湖上春風約不奈樓頭夜雨聲  
柳外斷雲篩日影試聽幽鳥話新晴

帝里風光二月新西湖幾隊

一作對

踏青人杏花時節偏

饒雨楊柳門牆易得春或是或非塵裏事無窮無達醉  
中身五陵年少誇豪舉寂寞詩家戴叔倫

寄湖州楊伯子監丞

宛如公幹卧漳濱枕上窮吟過一春遣病每懷詩眷屬  
訪醫因問藥君臣鑽龜小卜占災數覽鏡羸形類別人  
寄語雪川賢太守新詩莫厭話愁頻

梅

孤標粲粲壓羣葩獨占春風管歲華幾樹參差江上路

數枝裝點野人家  
冰池照影何須月  
雪岸聞香不見花  
絕似林間隱君子  
自從幽處作生涯

清涼寺有懷真翰林運使之來

不特來觀德慶碑  
江山勝槩六朝遺  
興亡了不關吾事  
登覽胡為作許悲  
梅為有香奇似雪  
酒能無悶妙於詩  
蕭蕭綠竹無人愛  
留取雲梢待鳳儀

覺慈寺

踏破白雲登上方  
自嫌塵土浣禪牀  
千山月色令人醉

半夜梅花入夢香，深谷不妨春到早。  
老僧殊為客來忙，山童懶慣勞呼喚。  
自拗枯松煮米湯。

寄復齋陳寺丞二首

豈說

一作直道

從來用處難出乘，五馬看廬山。  
鳳凰覽德下

千仞虎豹憎人上，九關持論太高天。  
動色憂時未老鬢，先斑平生風節誰其似。  
汲黯朱雲伯仲間。

長憶西灣繫小舟，野人曾伴使君游。  
夜浮星子邀明月，雨對廬君說好秋。  
坐擁紅粧磨寶硯，醉歌赤壁寫銀鈎。

當時一段風流事翻作相思一段愁

飲中歌僕赤壁詞為作大字書之今

刻石於廬  
山羅漢寺

### 黃州偶成

雁叫淮南欲雪天倚樓無味抱愁眠  
算從滄海白雲際行到黃州赤壁邊  
萬事忌於懷壯志一生窮為聳吟肩  
鬢間白者休教鑷要使天知老可憐

### 無為山中鄭老家

高談可聽用心幽灼見此翁非俗流  
鞍馬破家還避世

田園得地肯封侯  
開窓脩竹無由俗  
遶屋青山總是秋  
門外短籬看亦好  
黃金菊間碧牽牛

南康縣用東坡留題韻

鏡中雙鬢已非鴉  
身在江湖心在家  
道路飄零如柳絮  
山川迤邐近梅花  
客行有債頻沽酒  
老怕無眠戒飲茶  
昨夜夢歸滄海上  
釣竿橫插雁邊沙

李季允侍郎舟中

憶昨楓橋旣語離  
何期千里又相隨  
太湖不見鴟夷子



秋浦同尋杜牧之燈火船窗深夜話江山客路早冬詩  
人間草木空無數除却梅花莫我知

湖南見真師

致身雖自文章選經世尤高政事科以若所為即伊呂  
使其不遇亦丘軻長沙地窄儒衣濶明月池乾春水多  
天以一賢私一路其如四海九州何

廬山十首取其四

山靈未許到天池又作西林一宿期寺是晉時陶侃宅

記傳隋代率更碑山椒雲氣易為雨客子情懷多費詩  
暫借蒲團學禪寂茶煙飛繞髻邊絲

道人問我看廬山地上事如閣上看呈露千峰秋落木  
雕鏤萬象客凭欄靜中見得天機妙閒裏回觀世路難

管領風光有微憾桂花香裏酒瓶乾

太平宮朱陵閣觀山

擁鼻行吟上下廊今宵又宿贊公房松搖半夜風聲壯  
桂染中秋月色香白石清泉聞笑語名山大澤出文章  
老夫甘作無名者不逐紛紛舉子忙

乘鸞不見李騰空試與尋真訪故宮黃葉堆邊覓行路  
紫煙深處望仙蹤眼高天近千山上身共雲棲一壑中  
九疊屏風三疊水更無詩句可形容

豫章東湖感舊

憶見堤邊種柳初重來高樹滿東湖交游大半入鬼錄  
歌醉一時逢酒徒夜雨總成流水去春風能免落花無  
經行孺子亭邊路猶有沙鷗識老夫

僮約

汝在何鄉何姓名路途凡百愛惺惺衣裳脫著勤收管  
飲食烹魚貴潔馨每遇歇時尋竹所須教宿處近旗亭  
吾家僮約無多事辦取小心供使令

在一作住

同鄭子野訪王隱居

聯騎來尋失馬翁相期投宿此山中一庭花影三更月  
萬壑松聲半夜風共把酒杯眠不得劇談世事恨無窮  
明朝莫使兒童見

一作覺

尚有江船吾欲東

夜宿田家

簷笠相隨走路岐一春不換舊征衣  
雨行山崦黃泥坂夜扣田家白板扉  
身在亂蛙聲裏睡身從化蝶夢中歸  
鄉書十寄九不達天北天南雁自飛

豫章巨浸呈陳幼度提幹

乞得新晴賦晚霞出門無路欲乘槎  
憂風憂雨動經月足食足衣能幾家  
一飯共君烹瓠葉三杯無處看荷花  
自成鼓吹喧朝夕輸與東湖兩部蛙

訪趙東野

名時習休  
官隱居

竭來問訊病維摩  
花滿溪堂竹滿坡  
髮禿齒危俱老矣  
人高詩苦奈窮何  
四山便是清涼國  
一室可為安樂窩  
猶有憂時兩行淚  
臨風揮洒溼藤蘿

送滕審言歸長沙別無聊

折柳亭前送故人  
平沙留得馬蹄痕  
雲生渡口一作迷  
行路煙起江南認  
別村恨不與君同上道  
歸家無伴自開樽  
西樓獨倚黃昏月  
欲倩飛鴻寄斷魂

杜子野主簿約客賦一詩為贈與僕一聯云生就

來橋羅漢面吟成雪屋閭仙詩

杜陵之後有孫子自守詩家法度嚴秀骨可仙官況薄  
高情追古俗人嫌起看星斗夜推枕為愛江山寒捲簾  
飽喫梅花吟更好錦囊雖富不傷廉

題處士黃公山居

行盡松坡與竹坡沿溪窈窕上岩阿山深每恨客來少  
寺近莫教僧到多但覺洞中人不老不知雲外事如何  
邊頭又報真消息北使來朝乞講和

題何季湧江亭

勝槩何妨近市廛紅塵踈處著三椽  
數重青嶂橫天末一道澄江在眼前  
海浪浴紅朝出日樹林堆碧晚生煙  
請君分付堤邊石莫使漁翁來繫船

別鍾子洪

識得朝陽鍾子洪今人可想古人風  
文章有氣吞餘子天地無情負此翁  
問舍求田非細事叅禪學佛見新功  
欲知別後真消息莫惜頻書寄海鴻



再賦惜別呈李實夫運使

一生飄泊老江湖今日別公歸故廬此去怕無相見日  
因風或有寄來書雲煙過眼時時變草樹驚秋夜夜疎  
人物似公能幾輩不知天下竟何如

蕭學易何季臯和作別詩佳甚再用前韻

少年行脚白頭歸不負平生汗漫期望斷海山雲漠漠  
愁生江路草離離一篇王粲登樓賦幾首巴陵送別詩  
獨倚蓬窻無意緒瓦盆傾酒憶金卮

南安王使君領客湛泉流觴曲水

橫浦堂前舉一卮古榕陰下坐多時連朝好雨千山潤

昨夜新清

一作

秋一葉知梅嶺鄉來逢行

一作

者蘭亭今

日又羲之家聲不墜

一作傳家尚有

風流在如見初寮說好詩

去年訪曾幼卿通判攜歌舞者同遊鳳山僕有歌

舞不容人不醉樽前方見董嬌嬈之句今歲到

鳳山又闢西隅築堤種柳新作數亭且欲建藏

書閣後堂佳麗皆屏去之矣僕嘉其志又有數

語併錄之

一丘一壑自逍遙莫怪山人索價高是處園林可行樂  
同來賓客不須招臨風桃李花狼籍照水樓臺影動搖  
歌舞不容人不醉樽前方見董嬌嬈

別駕嘗懷物外心黃金屢費買山林後堂不肯著歌舞  
高閣唯思貯古今幾處亭臺新結束一春風雨阻登臨  
野夫昨日閒乘興著屐尋詩到柳陰

見淮東制帥趙南仲侍郎相待厚甚特送買山錢

又欲刊石屏詩置於揚州郡齋話別叙謝

如公當向古人求識面何須萬戶侯浪說釣鼉游瀚海

真成騎鶴上揚州受恩多處難為別宿酒醒時始覺愁

回首平山堂下路不堪風雨送歸舟

多一作深

鎮江別總領吳道夫侍郎愚子琦來迎侍朝夕催

歸甚切

落魄江湖四十年白頭方辦買山錢老妻懸望占烏鵲

愚子催歸若杜鵑濟世功名付豪傑野人事業在林泉

難禁別後相思意或有封書寄雁邊

董侍郎山園燕樓宗丞

旌旗千騎擁春華傾動臨川十萬家  
皂蓋出郊因問柳紫荷領客共看花  
樽前人唱鶯亦唱堂下吏衙蜂亦衙  
寄語風流賢太守好留醉墨伴煙霞

思歸

吟詩不換校書郎但欲封侯管醉鄉  
踈懶無成嵇叔夜清狂似達賀知章  
安貧不怕黃金盡既老從教白髮長

百計不如歸去好子孫相對說農桑

老矣歸歟東海村長裾不復上王門肉糜豈勝魚羹飯  
紈袴何如犢鼻褌是處江山如送客故園桐竹已生孫  
分無功業書青史或有詩名身後存

趙用甫提舉夢中得片雲不隔梅花月之句時被  
命入朝雪中送別用其一句補以成章

一時議論動諸公有詔西來玉節東又見清朝更大化  
好趨丹陛奏孤忠片雲不隔梅花月一雪翻成柳絮風

把酒莫辭今夕醉明朝車馬去匆匆

長沙呈趙東巖運使併簡幕中楊唯叔通判諸丈  
日暮遠塗行未休白頭又作長沙遊湘江一點不容俗  
岳麓四時皆是秋香草汀洲付騷客紅蓮幕府聚名流  
吟邊萬象寫不得上有風流趙倚樓

山中見梅寄曾無疑

自號雲巢名三  
異臨江軍人

香動寒山寂寞濱直從空谷見佳人樹頭樹底參差雪  
枝北枝南次第春有此瑰琦在巖壑其他草樹亦精神

移根上苑誰云晚桃李依然在後陳

余惠叔訪舊

扁舟訪舊入橫塘新柳今如舊柳長  
室邇人遙春寂寂風流雲散事茫茫  
縱題紅葉隨流水誰弄青梅出短牆  
政是沈郎愁絕處杜鵑不斷叫斜陽

滕審言相遇話舊

憶昨同君訪月林幾年相別到于今  
江山花草生詩夢風雨憂愁長道心  
久矣無波觀古井悠然得趣聽鳴琴



一生奔走成何事塵滿征衫雪滿簪

汪給事守鄂渚元宵代江夏宰吳熙仲獻燈

鄂州新得主人翁今歲元宵便不同燈火夜深回晝日  
管絃聲動起春風遼天月借三秋白陸地蓮開十丈紅  
妙手信能移造化速宜歸去補蒼穹

一晴收盡四山雲天與黃堂作好春西楚東吳獻風月  
南樓北榭擁星辰扶持入郭觀燈叟歌舞攔街醉酒人  
此是太平真氣象今年第一箇良辰

袁州化成巖李衡公謫居之地

一巖端坐挹千峰  
三兩亭臺勝槩中  
江水驟生連夜雨  
松聲吹下半天風  
因思世故吾頭白  
獨步林皋夕照紅  
欲吐草茅憂國志  
誰能喚起贊皇公

京口別石龜翁際可

把劍樽前歆地歌  
有何留戀此蹉跎  
心期難與俗子道  
世事不如人意多  
蓮葉已空猶有藕  
菊花雖老不成莎  
扁舟四海五湖上  
何處不堪披釣蓑

讀放翁先生劔南詩草

茶山衣鉢放翁詩南渡百年無此奇  
入妙文章本平淡等閒言語變瑰琦  
三春花柳天裁剪歷代興衰世轉移  
李杜陳黃題不盡先生模寫一無遺

諸葛仁叟縣丞極貧能保風節有權貴招之不屑  
其行

時人誰識老聾丞滿口常談杜少陵  
俗輩衆多吾輩少素交零落利交興  
權門炙手炎如火詩社投身冷似冰

堪笑老天無老眼相知賴有竹林僧

萬安江上

不能成佛不能

一作成

僂虛度人間六十年鏡裏姿容雖

老矣酒邊意氣尚飄然安排月白花紅句趁辦橙黃橘  
綠天無奈秋風動歸興明朝問訊下江船

飲中

布衣不換錦官袍刺骨清寒氣自豪腹有別腸能賭酒  
天生左手慣持螯蠅隨驥尾宜千里鶴在雞羣亦九臯

賢似屈平因獨醒不禁顙頰賦離騷

陪徐淵子使君登白雪樓約各賦一詩必以宋玉

石對莫愁村

樓名白雪因詞勝千古江山春雨餘宋玉遺蹤兩蒼石  
莫愁居處一荒墟風橫煙艇客呼渡水落沙舟人網魚

借問風流賢太守孟亭添得野夫無

唐時崔郾州館孟浩然于樓上遂有

浩然亭後人尊浩然改為孟亭徐使君詩併錄於此水落方成放牧坡水生還作浴鷗波春風自共桃花笑秀色偏于麥壠多村號莫愁勞想像石名宋玉漫摩挲試將有袴無襦曲翻作陽春白雪歌

靜齋張敏則舍人贈詩因用其韻為酬

胸次詩書一派清學如耕稼到秋成十年閉戶存吾道  
萬事無心逐世情葉落花開闢氣數山長水遠是功名  
摩挲老眼看新貴九鼎鴻毛孰重輕

客游

不能鬱鬱窟中藏大笑出門游四方與世周旋持酒盞  
觀人勝敗坐碁傍倒餐甘蔗入佳境畫著錦衣歸故鄉  
此志十年猶未遂倚樓心事楚天長

都下書懷

京華作夢十年餘，不道南山有弊廬。  
白髮生來美人笑，黃金散盡故交疎。  
明知弄巧反成拙，除却謀歸總是虛。  
出處古人都說盡，功名未必勝鱸魚。

新安寒食

不擬今年到歙州，要知行止豈人謀。  
一百五日客懷惡，三十六峰春雨愁。  
老矣此身猶道路，淒其歸夢繞松楸。  
花瓢仙子無由見，千里江山負遠游。

烏聊山登覽

抖擻巖塵上翠微  
旁溪寺上坐題詩  
忽聞啼鳥不知處  
細看好山無厭時  
風掃雲煙開遠景  
人攜香火謁叢祠  
客來千里登臨意  
說與時人未必知

癖習

平生癖習未全除  
虛事驚心實事疎  
為惜落花慵掃地  
每看脩竹欲移居  
逢人共作亡何飲  
撥冗時觀未見書  
爭奈一貧隨我在  
思量不若把犁鉏



田園吟

俗諺桐樹發花茶戶大  
家又云樹無梅手無杯

自古田園活計長醉鼓牛角取宮商催耕啼後新秧綠  
鋤磨鳴時大麥黃桐樹著花茶戶富梅林無實秫田荒  
狂夫本是農家子拋却一犁游四方

趙升卿有官不肯為里居有賢聲訪之於深巷中

深居陋巷不妨幽翠竹當門水滿溝每遇事來先覺懶  
欲為官去又還休田園自樂陶元亮鄉里多稱馬少游

除却讀書無所好有時間作北巖游

即化成巖也

括蒼石門瀑布

少泊石門觀瀑布明知是水却疑非  
亂拋雪玉從天下散作雲煙到地飛  
夜聽蕭蕭洗塵夢風吹細細溼人衣  
謝公蠟屐經行處聞有留題在翠微

杜門自遣

世事茫茫心事灰衆人爭處我驚回  
閉門不管花開落避俗唯通燕往來  
富貴在天求不得光陰轉地老相催  
平生任達陶元亮千載神交共一杯

登快閣黃明府強使和山谷先生留題之韻

未登快閣心先快紅日半簷秋雨晴宇宙無邊萬山立

一作今古如斯一水在雲煙不動八窗明飛來一鶴天相近一作旁羅

萬象山如立過盡千帆江自橫借問金華老儒伯幾人無忝

八詩盟

滕王閣次韻劉允叔

消遣客懷尋勝事酒杯詩卷得同攜當年傑閣棲龍子  
今日空梁落燕泥斜照浴紅秋水上好山橫碧畫欄西

幾人登覽皆磨滅唯有前峰壓不低

竹洲諸姪孫小集永嘉蔣子高有詩次韻

美景能兼樂事難愁來唯仗酒遮攔  
昂藏病骨兼詩瘦料峭春風帶臘寒  
喬木尚疑前輩在好花應笑老人看  
忍拋明月先歸去輸與諸郎徹夜歡

游雲溪與郡宴用太守韻即事二首

溪堂久矣無人到千騎傳呼五馬來  
流水奔騰砥柱立好山呈露晚雲開  
指揮壯士馳驍騎管領衰翁弔古梅

笑問風流羊叔子幾人登覽不塵埃

官府太平無一事凝香座上著衰翁飄搖短棹游方沼

縹緲高樓倚半空把酒夜深霜落後吹簫人在月明中

使君笑指

一作立

梅花說

一作下

去歲今年事不同

去歲臘月十一

夜寇至

懷雪蓬姚希聲使君

唐姚梁公作冰壺賦雪蓬有碑

寒入疎蓬夜雪深是非難辨口如瘡一官不幸有奇禍

萬事但求無愧心想像騎牛開畫卷丁寧回雁寄來音

傳家一首冰壺賦未信橫舟竟陸沈

有感中來不自禁短亭下短長吟梅花差可強人意

竹葉安能醉我心世事無憑多改變仕途相識半昇沈

一作龍隱湘江春水  
潤猿啼嶽頂暮雲深摩挲老眼從頭看只有青山無古

今有一  
作百

都中懷竹隱徐淵子直院

手攜漫刺訪朝官爭似滄洲把釣竿萬事看從今日別  
九原叫起古人難菊花到死猶堪惜秋葉雖紅不耐觀

多謝天公憐客意霜風未忍放深寒

送劉鎮叔安入京

謫居三山二十餘年真西山奏  
令自便趙用父使君為唱餞其

行坐客二十八人  
分韻賦詩得君字

二十餘年謫宦身此行便可上青雲  
西山一手為推轂南浦幾人爭送君  
橫水流傳無垢集海神驚見老坡文  
回頭莫有關情處別酒須教滿十分

次韻杜運使見贈

飄零敢說是詩人故舊多居要路津  
窮賤交游誰復記

江湖蹤跡早成陳無心涉世當歸隱有口逢人肯說貧  
家在翠屏山下住茅廬雖小可容身

思歸

地上皇皇蟣蝨臣著衣喫飯亦君恩不能待詔金鑾殿  
嘗欲獻書光範門身在草茅憂社稷恨無毫髮補乾坤  
才疎命薄成何事白首歸耕東海村

躬耕海上奈無田乍可經營買釣船未有人供令孤米  
欲從鬼借尉遲錢回頭歸路三千里藉手還鄉五百篇



幸遇太平時節好白雲深處了殘年

趙克勤曾橐卿景壽同登黃南恩南樓

欲從高處賞新秋上盡層波更上樓  
天地無窮吾輩老江山有恨古人休  
寧隨狡兔營三窟且跨飛鴻閱九州  
憶著當年杜陵老一生飄泊也風流

鄂州南樓不可到到此南樓眼亦青  
乾坤日月與高致城郭江山無遁形  
把酒縱談心耿耿倚欄遐眺髻星星  
世間萬事關愁思莫使秋風吹酒醒

山行遇秀癡翁

新冬行樂賞新晴幾箇江湖舊友朋霜蟹得橙同臭味

一作是水可臨山可登竹葉有松相映帶梅花與菊作交承樽前盡是論文

客林下那逢一作聞好事僧機解到時言語別李翱詩句

入傳燈

石亭野老家

野老將余到石亭先呼小豹出相迎  
依凭林谷住家穩奔走兒童見客驚  
牛豕與人爭徑路桑麻繞屋蔽柴荆

溪邊不合栽桃李猶恐春風惹世情

讀王幼學上殿劄子

才到朝廷被論歸孤忠幸有九重知  
神醫能識未蘇病國手難翻已敗碁  
四海爭傳治安策諸公如在太平時  
老夫懷抱緣何事未到秋來早自悲

謝史石憲送酒并茶

遣來二物應時須客子行厨用有餘  
午困政須茶料理春愁全仗酒消除  
不勝歡喜拜嘉惠無限慙慙作謝書

君既有來何以報一牀蘄簟兩淮魚

衡陽度歲

為懷賈誼到長沙又過衡雲湘水涯詩酒放懷真是癖  
江湖久客若無家茫茫萬事生春夢草草三杯度歲華  
把定東風笑相問忍將桃李換梅花

遇張韓伯說邊事

每上高樓欲斷魂沿江市井幾家存飛鴻歷歷傳邊信  
芳草青青補燒痕北望苦無多世界南來別是一乾坤

相逢莫說傷心事且把霜螯薦酒樽

久客還鄉

短簷紗帽舊麻衣鐵杖扶衰步履遲老去分為無用物  
客游誰到有歸時豐年村落家家酒秋日樓臺處處詩  
生長北方真樂土江淮百姓政流離

聞時事

昨報西師奏凱還近聞北顧一時寬淮西勲業歸裴度  
江左聲名屬謝安夜雨忽晴看月好春風漸老惜花殘

事關氣數君知否  
麥到秋時天又寒

寄趙德行

嘗有宛諸公  
進詩之說

平生幸甚識諸公  
未免歸為田舍翁  
詩稿敢求經御覽  
客身自笑坐天窮  
肯將釣手遮西日  
獨聳吟肩訴北風  
枉使西山有遺恨  
不能置我玉堂中

到鄂渚

連宵歌舞醉東樓  
不信樽前有別愁  
半夜月明何處笛  
長江風送故人舟  
十年浪跡游淮甸  
一枕高眠到鄂州

明日擬蘇堤上看當春楊柳政風流

艤棹江上

艤棹江濱訪舊游十年重到戲魚洲不知芳樹在何許  
但見落花從此流我醉欲眠因假榻客行未定且登樓  
有錢贖買張家酒準備明朝話別愁

萬安縣芙蓉峰

凌空傑閣為誰開隔岸芙蓉不用栽今古相傳彩雲現  
江山曾識大蘇來酒邊歌舞共一笑客裏登臨能幾回

翠浪玉虹從此去明朝人在鬱孤臺

汪見可約游青原

來訪青原古釣磯溪流滾滾濯龍奇一茶可款從僧話  
數局爭先對客棋雲雨那能敗吾事山林政喜得君詩  
石頭路滑籃輿小換得扁舟在水湄

除夜

掃除茅舍滌塵囂一炷清香拜九霄萬物迎春送殘臘  
一年結局在今宵生盆火烈轟鳴竹守歲筵開聽頌椒



野客預知農事好三冬瑞雪未全消

春日風雨中

瀟瀟風雨閉柴門年紀衰頽病著身大似梁鴻居海曲  
略如公幹卧漳濱三春晴暖無多日一世安閒有幾人  
聞道明朝新醞熟不妨祭竈請比隣

靈洲梅花

穿林傍水幾平章合有春風到草堂自入冬來多是暖  
無尋花處却聞香枝南枝北一輪月山後山前兩履霜

直看過年開未了醉吟且放老夫狂

寄廣西漕陳魯叟誥院

回首元龍百尺樓一時詩酒寄同游  
好山歷歷在人眼流水滔滔任客舟  
歸雁欲從何處去落花恨不為春留  
錦囊佳句無人問自別君來白盡頭

湖廣李漕革夫大卿飲客西湘

湘一作湖

管領風光此會稀坐中賓客總能詩  
神仙有洞人難見山水當軒看轉奇  
春不再生陶侃柏人來多打李邕碑

因思屈賈傷今古國有忠臣無用時

曾雲巢同相勉李玉澗不赴召

詔書催赴紫宸班九奏君王乞掛冠日暮倒行非我事

一作急流勇退有何難地靈不隱金砂勝秋水長流玉

澗寒好把山林寄圖畫試教天下故人看

江山

一作江上

借得茅樓一倚欄見成詩句滿江天歸鴉啼處客投宿  
野鴨飛邊人上船老眼尚嫌隨物轉閒心可惜被貧牽

平生錯功名夢金印何如一作須二頃賢一作田

京口遇薛野鶴

天下江山第一州可能無地著詩流黃金不愛買官職  
白髮猶堪上酒樓懊恨牡丹遭雨厄叮嚀芍藥為春留  
狂吟有禁風騷歇語燕啼鶯代唱酬

題邵武熙春臺呈子文使君

步到風煙上上頭恍如造物與同游千山表裏重圍過  
一水中間自在流近郭樓臺隔雲見隣峰鐘磬出林幽

風流太守詩無敵有暇登臨共唱酬

秋日病餘

桂子吹香風露深老夫吟老聽蟬吟秋來賸有行山興  
病後全無涉世心詩苦積成雙白髮酒豪輕用萬黃金  
平生意氣今如許獨抱傳家一破琴

海上魚西寺

北風三日弭行舟登陸因為島寺游自笑奔馳如野馬  
本無拘束似沙鷗人誰與語自緘口山有可觀頻舉頭

小雨疎煙晚來景老僧相對倚鐘樓

甘窮

自甘寂寞坐詩窮何取多牛積穀翁痛飲不孤連夜月  
浮生禁得幾秋風芙蓉媚日紅相對螃蟹著霜黃在中  
白盡鬚毛無可老此身未死却愁儂

黃州竹樓呈謝國正

每日黃堂事了時一心惟恐上樓遲發揮天地讀周易  
管領江山歌杜詩切戒吏來呈簿歷常邀客至共琴碁

風流太守誰其似半似元之半牧之

清明前夢得花字

白頭那辨老生涯幸有癡兒老主家百歲光陰一場夢  
三春消息幾番花掃松預造清明酒入峽先租谷雨茶  
隨分支吾度時節那求不死煉丹砂

訪慧林寺僧因有詩

故人有約訪鄉僧少坐西林待晚晴雙燕護雛更出入  
羣鴉攫肉鬪飛鳴長溪積水流無盡古木號風訴不平

一段見成公案在請君判斷要分明

喜梅雨既晴

屋角鳴禽弄好音樓頭夏木綠陰陰  
鑷空白髮愁根在熟盡黃梅雨意深  
苔榻有泥妨客坐稻田足水慰農心  
老夫已作豐年想鼓腹思為擊壤吟

李司直會客吳運幹有詩次韻

使君高會集羣仙也使狂夫坐細氍  
白壁一雙酬議論青春十載棹航船  
客愁遇酒退三舍梅信與春開一先



已辦扁舟明日去幾時重得到花前

一相識無辜獲罪

一宿津亭睡不成愁來物物是離情月輪高挂山河影  
江浪巧為風雨聲志士失途為鬼笑佳人泣血送君行  
塞翁得馬非為福公論如天久自明

送黃教授日巖之官章貢

久矣聞名不相識江湖還有見君時  
出人意表發高論入我眼中多好詩  
欲對春風開笑口不堪世事上愁眉

憑誰寄語

一作與

謝安石莫為蒼生起太遲

時召崔丞相不出

家居復有江湖之興

寒儒家舍只尋常破紙窻邊折竹牀接物罕逢人可

一作

好語尋春多被雨相妨庭垂竹葉因思酒室有蘭花不  
炷香到底閉門非我事白鷗心性五湖傍

題亡室真像

求名求利兩茫茫千里歸來賦悼亡夢井詩成增悵恨  
鼓盆歌罷轉淒涼情鍾我輩那容忍乳臭諸兒最可傷

拂拭丹青呼不醒  
世間誰有返魂香

杜仲高相遇約李尉

胸中無地著塵埃  
有手唯堪把酒杯  
苦恨好山移不得  
生憎俗客去還來  
秋風吹老東籬菊  
春信攬開北嶺梅  
管領風光須我輩  
急吹短笛棹船回

少算

吾生落落果何為  
世事紛紛無了期  
少算人皆嘲我拙  
多求我却笑人癡  
庭花密密踈踈蕊  
溪柳長長短短枝

萬事欲齊齊不得天機政在不齊時

處世

風波境界立身難處世規模要放寬萬事盡從忙裏錯  
一心須向靜中安路當平處經行穩人有常情耐久看

直到

一作道

始終無悔吝旁生枝葉便多端

送別朱兼僉

恰喜相逢又語離愁於江上送君時清談未了風吹斷  
白髮可憐天不知樗木自肥傷竹瘦海棠偷放笑梅遲

黃堂若問癡頑老，新有登樓十二詩。

呈姚顯叔南嶼書院

朝夕置身書卷間，紛華滿眼幾曾看。  
山林不受塵埃澆，屋宇無多氣象寬。  
立脚怕隨流俗轉，留心學到古人難。  
漫山桃李爭春色，輸與寒梅一點酸。

閱四家詩卷

翁際可薛沂叔  
孫季蕃高九萬

閱盡四家詩卷子，自然優劣在其中。  
石龜野鶴心相合，菊磴花翁道不同。  
鳴鳳翱翔上霄漢，亂蟬簫瑟度秋風。

一篇論盡諸家體憶著當年聳睡翁

謝吳祕丞作石屏集後序

說破當年舊石屏自慚無德又無能鄉來江海踈狂客  
今作山林老病僧高卧一樓成宇宙冷看獨影當賓朋  
惡詩有誤公題品不是夔州杜少陵

有感

老子生來世法疎白頭思欲把犁鉏摩挲此腹空無物  
僥倖虛名愧有餘憔悴不堪漁父笑寒溫無益貴人書

詩家幸有嚴華谷襟誼猶能眷眷予

湘中

一棹無情度碧湘行行不脫水雲鄉旗亭少飲村醪薄  
田舍新炊晚稻香簫鼓遠來朝嶽去包籠爭出趁虛忙  
塗人有愧黃居士十載看經不下堂

朱行父留度歲

衡山之下湘江上風月留連去較遲四海弟兄多不遇  
一門父子兩相知梅邊竹外三杯酒歲尾年頭幾局棋

羈旅宦游俱是客細論心事共題詩

蘄州上官節推同到浮光

馬蹄相逐到浮光客裏相寬對舉觴  
夜暖試鋪新枕簟曉寒仍索舊衣裳  
櫻桃著雨便成腐柳絮隨風如許狂  
連歲經行淮上路憂時贏得鬢毛蒼

贛州呈雪蓬姚使君

白旗走報山前事昨日官軍破綠林  
千里人煙皆接堵一春農事最關心  
不知郊外雨多少試探田間水淺深



翠玉樓中無限好可無閒暇一登臨

汪見可教授約諸大鳳山酌別

鳳凰洲上鳳凰山草草登臨見一班不立樊牆天廣大  
騰栽花竹地寬閒白雲四面峰千疊綠柳前頭水一灣  
行色催人詩未就寄情庭院落花間

何處景

都來五十有六字寫出山林無限奇當日所題何處景  
祇今但見後湖詩一言一語堪傳世某水某丘仍屬誰

試問愁煙推白鳥無情白鳥又何知

石屏久游湖海祖妣遂題二句於壁云機番白苧  
和愁織門掩黃花帶恨吟後石屏歸祖妣已亡  
矣續成一律

伊昔天邊望藁砧天邊魚雁幾浮沈機番白苧和愁織  
門掩黃花帶恨吟自古詩人皆浪跡誰知賢婦有關心  
歸來却抱雙雛哭碑刻雖深恨更深

汀州道上

宇內何牢落客行雙髻華千山萬山底老眼付梅花

寄興

代作

長願人人意一生無別離妾當年少日花似半開時  
黃金無足色白璧有微瑕求人不求備妾願老君家

江村晚眺二首

數點歸鴉過別村隔灘漁笛遠相聞菰蒲斷岸潮痕濕  
日落空江生白雲

江頭落日照平沙潮退漁舸閣岸斜白鳥一雙臨水立

見人驚起入蘆花

江陰浮遠堂

橫岡下瞰大江流  
浮遠堂前萬里愁  
最苦無山遮望眼  
淮南極目盡神州

淮村兵役

小桃無主自開花  
煙草茫茫帶曉鴉  
幾處敗垣圍故井  
鄉來一一是人家的

盱眙北望

北望茫茫渺渺間  
鳥飛不盡又飛還  
難禁滿目中原淚  
莫上都梁第一山

訪友人家即事

爛茅遮屋竹為牀  
口誦時文鬢已霜  
妻病無錢供藥物  
自尋野草試單方

晚春

池塘渴雨蛙聲少  
庭院無人燕語長  
午枕不成春草夢  
落花風靜煮茶香

揚州端午呈趙帥

榴花角黍鬪時新  
今日誰家不酒樽  
堪笑江湖阻風客  
却隨蒿艾上朱門

次韻郭子季曉行

脫葉園林帶曉鴉  
馬蹄步步踏霜華  
山邊水際頻凝顧  
怕有寒梅昨夜花

山村

山崦誰家綠樹中  
短牆半露石榴紅  
蕭然門巷無人到

三兩孫隨白髮翁

萬竹梢頭雲氣生  
西風吹雨又吹晴  
題詩未了下山去  
一路吟聲雜水聲

題吳熙仲雲萍錄

家在蓬萊海上居  
出身履歷一時無  
姓名羞上雲萍錄  
本是煙波一釣徒

湘中遇翁靈舒

天台山與雁山隣  
只隔中間一片雲  
一片雲邊不相識

三千里外却逢君

客中秋晚

榴花纔放客辭家  
客裏因循見菊花  
獨坐西樓對風雨  
天寒猶自著輕紗

都中冬日

脫却鷗裘付酒家  
忍寒圖得醉京華  
一冬天氣如春暖

昨日街頭賣杏花

寒一作貧

釣臺



萬事無心一釣竿三公不換此江山平生誤識劉文叔  
惹起虛名滿世間

端午豐宅之提舉送酒

海榴花上雨蕭蕭自切菖蒲泛濁醪今日獨醒無用處  
為公痛飲讀離騷

山中見梅

踏破溪邊一徑苔好山好竹少人來有梅花處惜無酒  
三嗅清香當一杯

書事

打鼓行船未有期恰如江上阻風時詩中一段閒公事  
幸不妨人喫荔枝

寄後村劉潛夫

朝廷不召李功甫翰苑不著劉潛夫天下文章無用處  
奎星夜夜照江湖

擁節持麾澤在民仰看臺閣笑無人劉蕡一策傳千古  
何假君王賜出身

客游仙里見君時  
擁絮庵中共說詩  
別後故人知我否  
年幾八十病支離

中秋李漕冰壺燕集

把酒冰壺接勝游  
今年喜不負中秋  
故人心似中秋月  
肯為狂夫照白頭

覓芍藥代簡豈潛

照映亭池芍藥春  
紅紅白白鬪精神  
與其雨打風吹去  
爭似慇懃折贈人

趙葦江與東嘉詩社諸君游一日攜吟卷見過一

語謝其來

白首無聊老病軀一心唯覓死頭顱時人誤作梅花看  
今日枝頭雪也無

巾子山翠微閣

雙峰直上與天叅僧共白雲棲一庵今古詩人吟不盡  
好山無數在江南

清明感傷

客中今日最傷心憶著家山松樹林白石岡頭聞杜宇  
對他人墓亦沾巾

九日

醉來風帽半欹斜幾度他鄉對菊花最苦酒徒星散後  
見人兒女倍思家

雪中觀梅鄭子壽畏寒不到

孤負溪橋雪與梅怕寒不肯出門來欲邀鄭老同清賞  
爭得梅花六月開

鄭子壽野趣燒燭醉梅花

古瓶斜插數枝春此即君家勸酒人  
移取堂前雙蠟燭花邊照出玉精神

東湖看花呈宋愿父

團團堤路行無極一株一步楊柳碧  
佳人反覆看荷花自恨髻邊簪不得

贛州上清道院呈趙雪蓬

短牆不碍遠山青無事燒香讀道經  
時把一杯非好飲

客懷宜醉不宜醒

到西昌呈宋愿父伯仲黃子魯諸大

一秋無便寄平安新雁聲聲報早寒昨夜檢衣開故篋  
去年家信把來看

扁舟幾度到南昌東望家山道路長醉裏不知身是客  
故人多處亦吾鄉

入閩道中

山中寂寞去程賒莫惜頻頻到酒家行李蕭然還不俗

人子口  
卷九十六  
擔頭顛倒插梅花

李敷文酌別席上口占

客子明朝早問程樽前今夜苦為情使君亦恐傷離別

不使佳人唱渭城

苦一作若

既別諸故舊獨黃希聲往曲江稟議未回不及語

離

別盡諸君不見君客愁多似海南雲一聲何處離羣雁  
那向江村靜處聞



老年懷抱晚秋天欲去思君重黯然  
聞道歸來有消息  
江頭錯認幾人船

林伯仁話別二絕

別酒三杯醉不知梅花嶺外故人稀  
片心暗逐白雲去  
日日向君行處飛

茉莉花邊把酒卮  
枕椰樹下共談詩  
醉來一枕西窗下  
酒醒方知有別離

題陳景明梅廬

手栽梅核待成林慈母當年屬望深  
梅未成林人已往  
空酸孝子一生心

思親如海渺無涯  
覩物驚心感歲華  
誰見詩人心苦處  
年年揮淚看梅花

題蔡仲卿青在堂二首

瀟瀟灑灑屋三間  
日日開門見好山  
但使青青長在眼  
一毫塵俗莫相干

幾人富貴不能閒  
夜運牙籌日跨鞍  
役役一生忙裏過

不知屋上有青天

寄王溪林逢吉

心腹相知會面稀  
一春未有盍簪期  
西窗風雨愁眠夜  
夢到君家賦小詩

陋巷深深屋數椽  
以文為業硯為田  
一觴一飯常留客  
知是君家內子賢

題梅嶺雲封四絕

東海邊來南海邊  
長亭三百路三千  
飄零到此成何事

結得梅花一笑緣

淮南得道嶺南行  
嶺上回頭作麼生  
傳得祖師心印了  
鉢盂何必與人爭

鑿破青山兩壁開  
石頭路上踏塵埃  
梅花自與白雲笑  
幾見夷齊出嶺來

南遷過嶺面無慙  
前有東坡後澹菴  
兒輩欲知當日事  
青山解語水能談

戲題詩藁

冷澹篇章遇賞難  
杜陵清瘦孟郊寒  
黃金作紙珠排字  
未必時人不喜看

昭武太守王子文日與李賈嚴羽共觀前輩一兩  
家詩及晚唐詩因有論詩十絕子文見之謂無  
甚高論亦可作詩家小學須知

文章隨世作低昂  
變盡風騷到晚唐  
舉世吟哦推李杜  
時人不識有陳黃

古今胸次浩江河  
才比諸公十倍過  
時把文章供戲謔

不知此體誤人多

曾向吟邊問古人詩家氣象貴雄渾  
雕鏤太過傷於巧  
朴拙惟宜怕近村

意匠如神變化生筆端有力任從橫  
須教自我胸中出  
切忌隨人腳後行

陶寫性情為我事留連光景等兒嬉  
錦囊言語雖奇絕  
不是人間有用詩

飄零憂國杜陵老感寓傷時陳子昂  
近日不聞秋鶴唳

亂蟬無數噪斜陽

欲參詩律似參禪妙趣不由文字傳箇裏稍關心有會  
發為言句自超然


詩本無形在窈冥網羅天地運吟情有時忽得驚人句  
費盡心機做不成

作詩不與作文比以韻成章怕韻虛押得韻來如砥柱  
動移不得見工夫

草就篇章只等閒作詩容易改詩難玉經雕琢方成器

句要豐腴字要安

卷九十六



宋詩鈔卷九十六



欽定四庫全書

集部  
宋詩鈔卷九十七至一百

詳校官中書<sub>臣</sub>賈 錢

主事銜<sub>臣</sub>徐以坤覆勘

總校官編修<sub>臣</sub>王燕緒

校對官中書<sub>臣</sub>劉源溥

謄錄監生<sub>臣</sub>鄭家屏

欽定四庫全書

宋詩鈔卷九十七

內閣中書舍人吳之振編

戴曷農歌集鈔

戴曷字景明號東莖石屏之從孫嘉定己卯登第授  
贛州法曹叅軍有東莖農歌集石屏稱其不學晚唐  
體曾聞大雅音者也集中答安論宋唐詩體者云安  
用雕鏤嘔肺腸辭能達意即文章性情元自無今古

格調何須辨宋唐人道鳳簫諧律呂誰知牛鐸有宮  
商少陵甘作村夫子不害光芒萬丈長知此可與言  
詩矣

侍屏翁遊屏山分得水字

攜琴入空山修竹翠相倚一曲千古心泠泠寄流水拂  
雲卧白石冥搜契玄理有時采薪人歌聲隔林起

秋日過屏山菴

淒切抱葉蟬間闌樓樹禽入山本避喧復愛聆此音微

颺動夕爽薄雲散秋陰衆籟聞以靜片月生東林

逐瘧鬼

咄哉瘧鬼何冥愚沉魄猶滯江流居孰云曾出高陽氏  
而乃不肖如此歟為妖常闖秋令動作威又竊炎官餘  
今年恣睢逞暴虐十户九室聞嗟吁人生一歲一寒暑  
自有大瘧纏其軀翻手為涼覆手暖笑爾禍福纔須臾  
癡兒騃女或汝怖那能嚇我烈丈夫汝不記少陵詩句  
有神語子璋髑髏血模糊昌黎遣逐更多術灌毒炷艾

揮靈符今來古往共憎疾奈何長惡終不渝胡不學鮫  
人細織冰綃製雲裾胡不從湘君緩移桂權掌芙蓉乃  
甘卑潔賈衆怨厭襮唾罵無時無爾來經旬瞰吾室再  
三謝遣猶踟躕吾詩吾酒既不廢汝窮汝技將如何大  
江秋色正瀟灑明月皎皎風疎疎便須悟悔速歸去嘯  
儔呼侶相嬉娛夜闌吟徹欲就睡燈花照眼團如珠夢  
回病思若然散颯颯風籟生庭梧

辛亥九日被檄視滯遂爽同官飲菊之約夜宿荒

驛風雨達曙

孤負重陽菊愁懷不寬郵亭一夜雨客枕五更寒脚  
健從渠老心低到處安獨行誰可語時把古詩看

納涼即事

炎蒸欣傍晚埽地坐寬涼入竹風逾冷生荷水亦香蟻  
行緣食兒螢照落書牀聽得農人語今年稻穗長

偕兄侍屏翁探梅屏山分得空字

踏破登山屐來尋傍水叢眼明千樹底春在數花中格

瘦詩難寫香寒酒易空狂歌歸秉燭驚怪走兒童

安居

安居元自好春晝更遲遲雪浦煎茶鼎雲生浴硯池栽  
荷填廢沼移竹補疎籬猶有閒光景歌眠讀舊詩

次韻屏翁新秋

檢點新秋事天公賜已豐秋牀梧葉雨曉袂竹林風閱  
世心先老傷時酒易中誰將和戰議細與問元戎

己亥十月晦大雷雨

舛令頻年見憂時百慮灰入冬常苦雨昨夜又轟雷土  
爛麥難種蟲傷菜失栽兒童不解事喜報海棠開

次韻屏翁冬日

曉起衝寒出霜明日未稀麥豐來歲本梅漏早春機水  
涸魚深隱蜜成蜂倦飛靜中叅物理一一見精微

自武林還家由剡中

一筇雙不借役役又東還野渡淺深水夕陽高下山光  
陰虛我老造物斬人間高躅思吾祖鳴琴獨閉關



次韻君玉弟春事

海棠紅未了又近牡丹時送日多忙事  
疇春久好詩暖風催麥早晴晷轉花遲  
不盡清遊興重為上巳期

次韻晚春二首

一襟塵欲滿刮眼得新詩風絮遺春恨  
煙花隔歲期筍抽蟲半蝕櫻熟鳥先窺  
光景渾如此心閒即好時

田園深有趣已分隱柴局老去情多感  
春來夢少靈游絲捲晴日飛絮入空庭  
預識今年好啼鵲枕上聽

春晚即事

春郊農務急野岸水痕高蒲渚鳴姑惡桑林嘯伯勞  
整欄扶芍藥寧網護櫻桃不改窮居樂何妨見二毛

次韻屏翁初夏會芳小集

一觴還一咏竟日醉難成坐石驚雲濕臨池愛水平  
密林宜午蔭啼鳥尚春聲更有櫻桃約明朝且願晴

夏初郊行

晴雨天難測寒暄氣未齊連村多綠樹終日嘯黃鸝  
田

水衝膝斷山雲着地低偶隨農叟語不覺過橋西

僻居

地僻塵囂遠身閑趣味深清池涵竹色老樹帶藤陰引  
鶴隨閒步招禪伴醉吟有時燃古鼎隱几自觀心

亦龍弟覆簣纍石作亭其陰屏翁名曰野亭索詩

漫賦

高懷抗塵外林杪著三間綠遶村邊樹青浮海上山目  
窮天變化心靜地寬閒鷗鳥知人樂忘機亦往還

秋晚

西風澄曉氣凝觀  
愜幽情草潤蛩聲滑  
松涼鶴夢清吟  
懷依水靜病思得秋輕  
忽憶登高近  
循籬看菊英

鄭安道終歲相聚臨別以詩見貽次韻為謝

解把詩言別那無計可留  
梅花兩心事寒雁五更愁  
我亦高懸榻君須獨卧樓  
後回相憶處莫返雪中舟

夏曼卿作新樓扁曰瀟湘片景來求拙畫且索序  
有此一樓足悠然萬慮忘  
拓開風月地壓斷水雲鄉  
四

野留春色千峰明夕陽眼前無限景何處認瀟湘

幽棲

幽棲頗喜隔囂喧無客柴門盡日關汲水灌花私雨露  
臨池疊石幻溪山四時有景常能好一世無人放得閒  
清坐小亭觀衆妙數聲黃鳥綠陰間

此生

此生畢竟已蹉跎有酒何妨醉且歌人世盡緣愁得老  
春花偏被雨相魔草欺蘭瘦能香否否笑梅殘奈俗何

試上東樓看霽景海山無數列青螺

書房

書房清曉焚香坐轉覺幽棲趣味真怪石一根雲態度  
早梅半樹雪精神池魚自樂誰知我林鳥相忘不避人  
得喪由來天自定莫將閒慮惱閒身

移古梅植于貯清之側已有生意喜而賦之

剝盡皮毛真實在幾年孤立小溪潯人來人去誰青眼  
花落花開自苦心不是野夫同臭味難教君子出山林

巡簷日日窺生意一朶先春直萬金

再得古梅小而益怪首蒙屏翁品題次韻

愛渠怪怪復奇奇冒雪遙憑健步移  
竹外池邊栽恰好山巔水際夢多時  
百年死質餘生意一片孤槎帶好枝  
寄語花神勤守護品題莫負老僊詩

觀敗碁者戲作

看人出着笑人低及至當枰却自迷  
角子僅全輸了腹東邊纔活喪於西  
欲裝劫去多難補待算征來恰又提

天下未應無妙手勸君莫愛墨黶猊

閒居幽事

閒居幽事屬田園何必山林始避喧足水早禾分母子  
多年脩竹見翁孫欣然勝敗無心奕兀爾醉醒隨意樽  
昨夜一番雷雨過綠波微漲曲池痕

己亥九日屏翁約諸孫登高西嶼阻風舟行不前  
遂會於吾家山海圖之上酒邊翁有詩留題因

次韻



良辰樂事兩相關喜我樓臺便往還不用移舟過西嶼  
只消把酒對南山風於破帽如先約菊為新翦欲笑顏  
留作千年佳話處詩翁醉墨照楣間

秋日獨倚東樓

重陽過了秋逾爽自豁樓窗眺晚西野水倒涵天影動  
海雲平壓雁行低興來頻放深杯飲吟到須還大字題  
近喜書房添一寶陶泓買得古端溪

次韻屏翁壬寅九日再題小樓

佳節相過共舉觴為萸菊醉亦何妨須知我輩襟懷事  
不是時人酒肉狂落雁影邊寒水碧歸鴉啼處夕陽黃  
詩翁樽俎風流在老氣橫吞年少場

初冬梅花偷放頗盛

清樽纔了黃花債又被梅花惱殺人妝點南枝無數雪  
探支東帝幾分春精神全向疎中足標格端於瘦處真  
徹夜苦吟無好語夢隨雙月步溪澗

四月即景

茶歌纔了又田歌節物真成一鳥過蒼竹颭風涼意足  
碧梧留雨夜聲多瓜緣茅屋抽長蔓藕過蔬畦出矮荷  
最喜白鷗相狎久對人自在浴清波

次韻鄭安道懷君玉弟游東嘉

好山好水東嘉郡兩月清游樂可知遠想池塘頗夢汝  
還當風雨對眠誰別時菊蕊方宜酒幾日梅花已索詩  
雁影參差霜正冷寄言歸計莫遲遲

春事

春事關心常早起  
愛看景物試凭欄  
戲魚池面微添綠  
啼鳥枝頭尚帶寒  
斬棘重樊新插柳  
斟泉頻灌自栽蘭  
年來賸有園林興  
每恨蘆邊地不寬

賞茶

自汲香泉帶落花  
漫燒石鼎試新茶  
綠陰天氣閒庭院  
卧聽黃蜂報晚衙

夜過鑑湖

推蓬四望水連空  
一片蒲帆正飽風  
山際白雲雲際月

子規聲在白雲中

喜小兒學步

對周尚有六十日舉足已能三五移世路只今熾險甚  
須教步步着平夷

夏晝小雨

小牀蘄簟展琉璃窗外新篁一尺圍正午雲橋疎雨過  
冬青花上蜜蜂歸

里中小漁舟被差防江有感而賦

著身平地更多憂一棹思為泛宅謀昨夜西風邊報急  
防江也要釣魚舟

天台道上早行

篋輿軋軋過清溪溪上梅花壓水低月影漸收天半曉  
兩山相對竹雞啼

五禽言

提葫蘆沽美酒人世光陰春電走一日得醉一日閒綠  
髻幾曾俱白首沽酒沽酒有酒沽生前不飲真愚夫

不如歸去不如歸去千山萬水家鄉路今年又負故園  
花來歲花開定歸否歸去歸去須早歸近日江湖非舊  
時

泥滑滑泥滑滑客路迢迢雨不歇我僕十步九步蹶我  
馬驪駒如跛鼈泥滑泥滑君莫愁秋爛麥損尤堪憂

脫却破袴脫却破袴蠶熟繰成霜雪縷小姑織絹未落  
機縣家火急催官賦輸了官賦無零落破袴破袴還更  
着

麥熟鍛磨麥熟鍛磨村南村北聲相和大男小女總欣  
欣煑餅蒸糜任渠做鍛磨鍛磨莫等閒去年糠粃無得  
餐

小畦

小畦尋丈許鑿壁置柴扉雨後菜蟲死秋來花蝶稀插  
籬新種菊抱甕已忘機俗客忽相訪妨人洗布衣

有感

浩浩海風勁滔滔河水渾古人皆去世喬木自當門族



黨諸孫盛吾宗一綫存興衰知有數心事與誰論

十日取野菊從酒

野徑菊仍好村壚酒亦嘉未應今日蕊便是背時花  
心在家千里身猶客九華官程難久駐風雨暮山斜

山家小憩即景效藥名體

柴門通草徑茅屋桂枝間脩竹連翹木高松續斷山  
仰空青蔭密埽石綠花斑傍澗牽牛飲白頭翁自閒

從板橋買舟上青陽

卸馬板橋西扁舟逆上溪水鏤巖骨斷煙截樹頭齊野  
鴨驚人起村雞上樹啼老農頭雪白猶自把鉏犁

抵池陽未入關泊於齊山數日因窮巖壑之勝

山有

翠微亭杜牧  
之登高處

瘦策相扶上翠微眼驚奇怪足忘疲三十六洞猶昔者  
四百餘年無牧之漲水森瀾春雨後遠山重疊夕陽時  
幾多江北江南恨問着沙鷗總不知

秋暮出關即事

俗塵汨汨負清游重出城來已暮秋水洗柳根歆斷岸  
霜摧蘆葉擁荒洲鄉音不到愁來雁野性無拘羨去鷗  
可惜一堤明月好隔關難作夜深留

歸途過麻姑山

山行十里少人家客子貪程怕日斜倦坐松根需足力  
輕風滿面落藤花

五松山太白祠堂

太白讀書之地詩有要迴長  
舞袖盡耕五松山即此山也

艤舟來訪寶雲寺快上山頭尋五松捉月仙人呼不醒

一間老屋戰西風

歸途過銅官山

山徑崎嶇落葉黃青松疎處漏斜陽  
鳴禽無數聲相應  
一陣微風野菊香

宋詩鈔卷九十七